

四庫全書

集部

欽定四庫全書

集部
鶴山集卷八
六至

詳校官庶吉士臣張溥

主事臣呂雲棟覆勘

總校官檢討臣何思鈞

校對官編修臣楊壽楠

騰錄監生臣瞿東慶

欽定四庫全書

鶴山集卷六

宋 魏了翁 撰

古詩

贈曾鑿

太極分陰陽物物具兩儀乾坤互南北坎離迭東西四
時有見伏晝夜有盈推夫人遷於物由之而不知六淫
一為沴大命鑿所司或當暑而裘或御冬而絺或學製
而傷或助苗而萎其間號為儒亦以身嘗鑿江西有曾

君邂逅荆江湄暇日與之語切磋及幽微傍人趣行邁
欲別不忍離乃書所素講為詩以贈之

四川茶馬牛寶章大季修揚子墨池以書索題

詠

子雲一去千餘載惟有成都墨池在草玄此地是耶非
玄文今在人誰知雖逃劉歆醬甌阮鼠壤蛛窠蠹魚宅
豈無學者工探求不譏僭聖譏贅疣自從馬邵造玄域
晁氏譜之張氏翼亦云察矣人猶疑試為諸老申其辭

易書廣大包天地辭變象占都一致世儒造入各不同

有一于此均為功況於易元玄相發不同之同真善學

歷家中首先黃鍾雖以坤復為初終

中首先黃鍾謂太玄八十一首起中

以準中孚取復前七日
中孚卦氣隨天左行 紀日天正始牛宿又以日星分

左右

玄以甲子朔旦冬至日起牽牛初度取日所歷之星度宮分背右行

起從冬至易玄

均意欲取臣承明君

臣承君謂主日右行注見後

易書八八而用七

八八用七謂六十四卦不反對者八卦惟五十六卦反對 玄文九九而存一

九九存一謂玄

有八十一首而日 易分六位中二五臣志上通君下取
法用七十二策

玄以一五而為中君道君尊臣代終玄文主日易主歲

玄主日謂日法取朔至牛宿初度易主歲謂起甲寅歲凡四千五百六十歲為一元七元為一極此康節說

易書為經玄為緯謂玄於易地承天就中邵子尤知玄

康節準易圖序曰玄之於易如地之於天也 或云玄準卦氣圖是圖疑亦非

聖書豈知中復與咸遇乃是陰陽自然數

玄準卦氣圖圖自復至咸

八十八陽九十二陰自遇至中孚八十八陰九十二陽咸至遇六日七分中孚至復亦六日七分故上系七爻下系十一爻亦起中孚咸 或云玄倣太初歷黃鍾之分八十一豈知

虛三與虛九其數雖同其法否

太初歷以律起歷八十分為日法取黃鍾之

管九寸九凡八十四分存律呂數用七
十有八即虛三也玄八一即虛九也

或云玄象宗渾

天渾天方象包於圓豈知兼用蓋天說蓋以輿地承純

乾

子雲覃思渾天而作太玄渾天以天包地而玄以方州部家圓圖在上首表贊方圖承其下乃兼用蓋天

之說地承天之象也

易雖無玄不為闕易更得玄滋有發且如河

圖與洛書發揮道數無遺餘後來支幹及聲律運氣參

同至太一

此數者雖與圖書起數不同而皆合

與易並行人不譏千歧萬

轍同一歸况玄於易同而異何獨於玄有譏議子雲之師

曰林閭鶴山之下訓其徒

子雲之師曰林閭翁儒臨邛人也鶴山為邛之望

自

翻機杼作生活律歷圖書無不合若非馬晁二公身後世
幾無揚子雲後世子雲今繼作而此玄文終寂寞空餘

繪象與棠陰聊與文字供嘲吟

繪象乃袁參政重修祠堂閣下本摹置中堂左

列玄學源流右圖獨吟池上多海棠不知年矣

和靖州判官陳子從山水圖十韻

子遷靖州判官陳子從珪為鄰嘗從容出示

靈竹僧不二山水圖其末有乃祖乃父十詩

二幅前賢風裁邈不可及取次韻以識高山

景行之仰云

外物羈繫人無退亦無遂愧彼自由身朝發予夕至

右彭蠡歸舟

山堂有何觀四時互興歇萬物隨天根東生復西滅

右山堂曠望

水月皆內景入秋倍清暉世無善觀者滔滔吾誰歸

右重湖汎月

士非耕釣者而從蓑笠翁人生貴適志莘渭亦時中

右星灣晚釣

澤氣蒸前山起自膚寸微競看千丈瀑不悟片雲飛

右雨後觀瀑

松栢不受凋此亦易知耳須看竹有筠與松相表裏

右松徑晚步

莫作流谿看天命無窮已詩人若知得千古可坐致

右谿上賦詩

散髮避炎暑炎暑苦相尋云何對大賓不見汗沾襟

右林下避暑

松竹貫寒暑而梅時往來不知復妬意隨人漫徘徊

右載酒尋梅

懷人得清晤此樂浩無期剡溪興盡返未喻伐木詩

右雪中訪友

過屈大夫清烈廟下

歸州歸鄉作

鸞皇棲高梧那能顧鴟梟椒蘭自昭質不肯化艾蕭人生同一初氣有善不善一為君子歸寧受流俗變云何

屈大夫屬意椒蘭芳蘭臯並椒丘紉蘭薦椒漿騷中與
歌首蘭必以椒對謂椒其不芳謂蘭不可佩此言混凡
卉臭味自爾殊云何歲時改二物亦變初以蘭為可恃
委美而從俗椒亦佞且愒于進而務入椒蘭信芳卉氣
質自堅好胡為壞於遷晚節不可保意者王子蘭與夫
大夫椒始亦稍自異久之竟蕭條迨其習成性甘心受
蕪穢不肯容一原寧以宗國斃禹臯於共工旦封與鮮
度同根復並生何嘗改其故原非不知人觀人亦多塗

治朝中可上亂世賢亦愚况原同姓鄉義有不可去所
望於兄弟謂其猶可據我本兄弟女孰知胡越予以是
觀離騷庶幾原心乎或云芷蕙等豈必皆名氏騷者詩
之餘毋以詞害意仲尼作春秋定哀多微詞楚之嬖小
臣况亦有不知

至左縣書懷呈榮州綿州二兄

歲行析木予去國鷄尾之年纔返室東西南北著此身
水陸二千三百日或云子非善謀身幸生斯世同斯人

胡為嘍嘍苦自好輕辭富貴重絕貧五谿之濱有何好
兀坐六年不知老輩門待汝有何惡要把山林易旌纛
予聞其言心自語吾非斯人而誰與獨嗟行止各有時
龍蟄鴻歸亦其所洋州牧將鳩餘民仰空待救人不聞
黎州邊丁成內郡空養赤子防西門綿州近院劔龍路
列雉驚奔渠不顧敘州字蠻亦良苦卒以憂勞棄予去
見危授命理之常苟得死所庸何傷所憂人已兩無益
燕蝠晨暝徒皇皇鶴山之顛一畝宮我名吾亭曰願豐

只祈天心諒悔禍雨禾雨麥蘇民窮有糧餉士可衛民
有民給耕可供軍民相資護關塞固又須監牧長得人
規摹便立久安勢不作目前苟偷計弟兄歸與里父師
長對春風賦棠棣

壽四川制置李侍郎

崧高二王德豐水數世仁一心千古脉一氣三才根人
言通德門封培知幾春陵州不盡用雖國非全神厥美
鍾在季魯殿歸然存誰知中興主流澤被子孫是用遺

一老為社稷萬人三朝典刑舊四海觀聽新自公鎮西南威聲懔北部棄地遄歸疆餘民亦安土便當度雙劍建大將旗鼓進賢黜不衷討貳誅失伍增屯御驕卒募耕實邊圉堂堂當道臥一勇銷百侮願公排羣議釋我分外慮上流屹長城却歸輔明主

送高才卿出守嘉定

次東坡送張嘉州韻

十年誰遣不寧侯
鷹奔鳥散十七州
餘州蹙蹙能幾許
使君今作載酒遊
諸公飲雋已濡首
眼前百事不挂口

震風凌雨揭卻屋左蟹右杯猶在手使君千騎行清秋
豈為杯酒饒涎流綢繆牖戶既云晚夢魂不到花繞樓
乖逢聚散古今有而我此時持此酒河梁竚立不知還
挿頷青絲半成叟

次韻蘇和父自邗見寄

敬共事明德懷如槃水時豈惟將弗勝抑恐濁且滋結
髮齒名流幾被末俗移學晞遷商博文慕莊騷為書不
記癡龍詁不通雌霓恥於市朝捷甚於溝壑擠大道砥

如平隲身蹈難危迨其閱世久始識真聞知天命賁草
木生意長萋萋蕃鮮固可樂稿瘁安足悲陰陽孰信詘
日月誰盪推乾坤奠中極雷澤周四陸夫人命於誠地
生而天施五行根五事位育誰司之嫫浮溺於詞躁輕
亂於儀山雞銜清影祇以速顛躋况彼膜外祭皇皇復
滋滋此於我何加寒暑自四時蘇公西南彥儀鴻漸于
達而我坐遠屏七年墮蠻夷夢思岷山陽枯筇伴龐眉
人才日零落憔悴西南維大運忽開子烟烟晨星垂公

來可勇邁我往何棲遲敢晞會溫潞竊願商濂伊默嗟
氣相求范喧蜜成脾梅邊立踟躕正待陽春歸

七夕南定樓飲同官

誰將明星貼天宇州國宮垣象官府更將四七隨天旋
常以昏中殷四序迢迢河漢衡秋旻前有蒼龍履玄武
牽牛正向西南來左右兩旗北河鼓鼓星之側為天桴
鼓上三星為織女何年人號天女孫便把牛郎擬夫婦
不知此是天闕梁河漢之津有常度晦明伏見莫非教

肯為文人給嘲侮班曹庾謝猶讐言世上兒曹更堪數
臨風三誦大東詩須信詞章有今古

中秋領客

中秋無常期月望無常歷况於月之房歲十有二集云
胡三五夜賞翫著今昔我觀魏晉前未有娛此夕豈由
夕月禮承訛變淫液天行至東北陽外乃朝日日月向
南來三務趨朔易則於陰之反順時報陰魄古人敬天運
隨處察消息俗學踵謬迷更以擬科級廣寒八萬戶桂

樹五千尺文人同一辭祇以驚俗客墨墨數百年月如
有冤色為作反騷吟聊以補載籍

重陽領客以老杜舊日重陽日詩分韻凡賓主
十八人得不字

天根斂秋陽雨畢水歸藪胡為爽常度白晝變昏黝農
功將納場餘秉尚棲畝昨朝告方社卷去日中節義和
鞭六龍為我作重九雲頑驅復來渾未識滅不終然劃
劉之金鑊發矇瞍所忻陽德競吾豈為杯酒悠然見南

山陶公意何厚况今祠太宮群公正奔走

游北巖之疇昔夢作二詩覺而僅記一聯云鬢

髮絲絲半已華猶將文字少年誇明日為客

誦之客十三人請以是為韻予分鬢字

時事彫壯心詞華誤雙鬢昨夢忽做予覺來起孤憤五

官予所司此夢乃予訓見心協著龜是氣通禊輝形骸

且不察理性抑難盡曉筇度雲壑疏林露鷹隼暮歸踏

江聲寒流燭蛟蜃惕思懷曩日氣勢如項陳天根忽晨

見卷去不盈瞬猶然玩文采吾果不知分羣飲習未忘
依前賦分韻

上巳飲客

流觴元已奚所因更指三日為良辰山陰坐上皆豪逸
長安水邊多麗人臨流有許豪與麗元無一箇能知津
韓嬰何憑指溱洧東哲胡據誣周秦千年混混同一波
競言此日天氣新其間號曰該洽者或言亂降祠高辛
春分以後弗無子徃徃援引詩生民說雖有稽義猶鑿

况復除日經無文予嘗妄意已為火季春火見疑乘寅
寅居漢津火所畏故以元已被水濱一年奇月必用重
三三欲解陽德屯較之前說已云近終媿俚俗疵吾醇
要須挈我沂泗上回瓢點瑟看長春

永嘉林君誼父得英石名其室曰盱齋予易以
介室

柳侯謂楚南多石而少人至今英道間異石何嶙峋乃
知五行氣中土為秀民降才既匪易自棄奚不仁伍文

日炎灼乃以焚其身林君若知此是石當書紳

羅五星善弈碁子詩

少年不識碁但見剝琢琢更相圍有人指授予衝關
奪角劫復持少年不識星但見膈膈膊膊還如碁亦有
告予者縮羸伏見元有期七年五谿讀書暇時把二事
相悅怡久之割然悟是間有數人不知三百六十一碁
子此是乾策藏其竒萬有一千五百二十星若以三十
六乘之乘之既盡除坤策恰與碁數無參差此理極精

密歸後不復思羅生挾二長過我瀘之湄恍如著我五
谿上欲與之語無閒時此須靜觀乃有得而我家住西
山西生揣我何時歸

七夕有賦

經星不動隨天旋枉被嘲謔千餘年無情文象豈此較
獨嗟陋習輕相沿我嘗作詩詆排之尚有遺恨汙陳編
人於萬物為至靈聰明照徹天地先其如形氣之所囿
則以學問開蒙顛不知誰為乞巧者乃謂天孫執其權

天孫能裹不能報世間之拙無加焉癡兒駭女競針縷
高樓大第迷管絃漢魏以來用一律無人出話扶其顛
其間假拙濟巧者又欲託此文姦言敢因良會追往事
更發此義聲餘寬

黃成之量求虛舟詩

黃君求我古誠州求之不得還西遊所求易與胡不與
渠家自弄莊生舟莊生傳之賈太傅便將死生同浮休
我家舟子與渠別中孚之象剛包柔仰山俯澤乘巽木

藏離伏坎含坤牛中間至虛若無物實理備具非空浮
此在太玄首黃宮其於參同居中州會通古今貫徹顯
上下天地同周流人將百年等浮漚我以千載為春秋
我言似大而非誇人人皆有不自求黃君不信謂子赫
我自姬孔君莊周

中秋有賦

望舒與日元非敵震受陽光巽成魄六十四象不言月
三百五篇幾月出易道貴陽不貴陰賓禮卜晝不卜夕

世間賞玩起何年誤却千年醉狂客不知客有肺腸無
更把荒誣作真實我因時序嘗作詩洗盡兔窟蟾宮迷
今年新作東樓成胡為尚此窮攀躋人心和平民氣樂
日月昭明天宇豁須知此事與政通不是詞人間賞月

送游吏部赴召

天馬周流不停策青龍掛空山無色區中物物見根源
雲樹依依送行客鏃金伐鼓行清秋江頭組練雲如稠
道旁老人相與語主賓聞之愕相顧或云造闕如登山

一聲警咳落九天豈知位高勢逾偏莫向紫宸庭下立
非關噉蜀解暗嘿紫宸地禁鳴不得或云敢言擬鳴鳳
千古高名泰山重豈知說著心骨驚臣名愈重國愈輕
或言古人重晚節元忠子方費分說豈知晚節不難保
却憂攘臂為人笑三人所贈不皆然然則子也今何言
元祐中年基紹聖建中靖國何嘗靖若教此事久講明
直將兩是為端平是時臣言便休得臣不憂身却憂國
臣願天意開平治明良長似改元時夬剛未終戒蒐陸

姑陰雖微畏羸躅直教世道端且平寧使臣無赫赫名
三人颯然笑子之所願吾不到吾言必於身子言望於
人子意雖厚吾言真低頭謝二老還以告景仁

奉謝資陽謝純夫諸友是日三池周季章馮季
修許德開資中友仲壬至謝介卿馮清叔廣
漢常光父繼至遂寧楊儀斯期而未至

駕言南東畝捷出西北隅資陽有八士持謁要諸塗須
史平泉道衣冠被林廬問我來何方過我不適予吾非

煩囂避樂此簡便趨經行三紀後舊交半丘墟翁仲草
沒滕兒孫霜滿鬚其間最所懷劉公真丈夫許張二良
友直氣橫九區堂堂舍我去顧景霜月孤寒梧陶令宅
宿草黃公壚我豈無肺腸拊事成嗟吁待到西州門不
如早回車作詩謝吾友努力崇遠圖三家令子弟不諒
予心乎

贈畫工王生

七年謫五谿二年守三盧蠻烟瘴雨中不改舊時吾此

來懶看鏡謂我衰且癯王生忽肖象氣貌何手据悔不
賂王生圖作一病夫庶幾轉而上聽我歸林廬及此未
衰日更讀幾年書

次韻趙制置制勝軒詩

何年誤認羆作熊力小知薄當戎衝級夷藩技牖戶破
至今風色長如冬去年推轂以授公單車飛度雙劍峯
風稜犖犖膽氣雄臨淮軍壘足跡重夜起攬衣瞻井絡
鑄鐵不知經幾錯竭來談笑上文楸龜頭局中虎口著

誰將輿柴誤戰塵天戈一揮如砥平濯洗獬豸威蠻荆
捷書夜上白玉京考成軒戶適茲日一吐十年曾拂鬱
看詩又覺饒餘力要殄餘憂寬旰食書生喜極還太息
天下憂端尚非一經營分表竟何益盍護本根保成勛

端平三年春三月戊午朔天子有詔俾臣了翁

以僉書樞密院奏事既上還山之請乃休沐
日丁丑與賓佐謁濂溪先生計賓主凡二十
有二謂是不可無紀也遂以明道先生雲淡

風輕之詩分韻而賦而詩有二言有四言同
一韻者則二客賦之了翁得雲字

書生不知分奉詔行三軍赤手張空拳幸脫貔虎羣四
海蓮華峯濂溪張清芬擬求一勺水洗我三斗塵翠湫
明夕霏晴雲盪朝氛重上夫子堂聲咳如有聞池蓮已
濯濯庭草長忻忻重惟夫子書千古披昏氛善惡萌於
幾陰陽玄而分一落俗儒喙曉曉齒穿齟流傳豈不廣
世道滋放分書生屢乞骸歸耕故山雲願言與同志相

期任斯文

江東漕使兄約遊鍾山分韻得冷字

連年飲建業寤寐北山靈三過又不入風雨盲其程一
朝決會期萬籟不敢聲斷潢捲夕潦列嶽浮霄青因思
山中人昔日相熙寧不知學何事莽制為周經羣公咸
其輔不悟宗康成相承至章蔡九州半羶腥歷年百七
十衆寐未全醒三經猶在披從祀猶在庭追惟禍之首
千古一涕零大鈞窅難問山雲水冷冷

贈畫工王三錫傳神

氣質紛不齊四海無似人籍令貌相近氣有醇不醇善
觀人品者儀觀與機神正邪眸子見善惡眉間分且如
孔與虎二人自非倫而俱類孔子俗眼何昏昏古人有
夢遇便知為良臣又能記眉目曉然得其真此須以神
會難與淺者論王生歸為我試語司寇君此理充得去
三代同此民

題溫泉

廬山一滴水雕盡詩人腸道旁有溫泉忽然如遺忘淺
夫既閣筆知士亦括囊或云匪難知水火互陰陽水根
於一天至陽所潛藏所以井生熒亦有泉如湯吾嘗謂
或言子語未精詳水實含內景火乃無寒光水將而不
迎火迎而不將君看月受日又驗坤含章吾言與邵語
或可補詩匡

鶴山集卷六

欽定四庫全書

鶴山集卷七

宋 魏了翁 撰

律詩

次程少逸餞楊叔禹

汝明教授

載酒時從執戟郎
雅知清望稱鴛行
肯來芹泮提英茂
要取芳編閱舊香
玉倚蒹葭方借潤
珠移甍社陡寒光
臨來莫恨車無角
凝睇雲霄紫鳳翔

和史少莊登山韻三首

賸喜向前坡人情奈怯何君今高著步直與陟嶒峩
田間逢醉尉人道誤誰何世路日杲杲冥行宜見呵
毋得支山險此山能幾何崎嶇十年夢如歷幾蹉跎

和李參政壁龍鶴庵廬二首

落紙新詩萬口傳逍遙舊夢記坡仙明虹短雨下平楚
老鴈長雲橫半天澗底青松不改色檻前流水謾安筌
寄聲多謝無名子莫攪詩翁禿鬢眠

古往今來一貉丘行藏有道坎還流鳳凰池上春風夢

龍鶴山頭夜月秋閒曳深衣聊獨樂有懷連壁賦三游
何人得與余心會野水黏天一片鷗

和李校書 埴沐川三絕

靜看青山簇髻鬟動觀碧水激潺湲若教此景來鄴鄩
爭奪應成觸與蠻

花時乘傳奈邊心撩弄新詩逼少陵詩到湖邊春未老
不禁春思也微吟

玉節行邊春正濃邊頭壯士簸旗紅何當平賊攜諸吏

徑上高寒翦翦風

次韻外舅楊崇慶熹以詩相招三首

炎威翕翕正塵人惟有西風不世情
困臥小窓倦賓客
吹將好語到巖扃

去年湖上看花時拍檻呼魚酌酒卮
魚計主人已非昔
猶驚故處上鈎遲

寄語荷郎且緩開山中衣製要君裁
不隨襌襪觸熱去
行學山陰乘興來

李參政壁見招游龍鶴山而歸途有作

上有高峯樹倚天下臨深澗水生煙陶鎔泉石山中相
舒卷雲霞地上僊松色呼兒開後檻筍輿為客過前川
不因同落天涯久那得巖扉共此緣

亂澗穿雲十里閒好風吹袂出重山潺潺流水半歸壑
唧唧候蟲皆閉關興念歲時驚變態靜觀物化識回環
並溪的皜梅花樹已帶明年春事還

和范少才子長詠雪三首

底處呼滕六，催將歲事闌。
窓明朝采爛，枝瘦夜光蟠。
炫晃山林老，糝糊天地寬。
曉琴絃欲折，難忍溧陽酸。

隨踏曉巖去，殿頭金井闌。
路門圭壁委，雙闕絳青蟠。
拜手朝紳肅，憂心盱食寬。
歲糜今有望，寧復壓菹酸。

寒陰彫草木，枯葉委庭闌。
蒼聳孤松秀，青敷萬竹蟠。
封條纔貼妥，見覘復歌寬。
但使根長在，毋憂風哭酸。

恭和御製聞喜宴賜毛自知以下

昭代賓賢禮意誠，鎬京設席藹儒纓。
龍飛十二周星紀

鵬運三千擊水程雲漢成章新寵渥鈞天張樂播和平
微臣置饋申規戒賢網雖恢用欲精

和張大著顛字韻二首

步弱扛豐分疾顛不將臭腐易芳鮮眼前富貴蟻奔堙
膜外功名鷗避船忠憤無因塵乙夜隱憂深覺負丁年
一窓風雨看書卷三度索梅雪可憐

張張趨局曉衣顛妙語飛來墨已鮮太乙藜然分夜隙
蓬萊海濶接風船臨叩詞客雖未至淮海簽書非少年

獨抱區區無我察，聯篇重拜玉人憐。

張大著以韓持國綠樽紅妓事再和見戲復次

韻

世路羊腸幾覆顛，如君操行雪朝鮮。書曾滿貯宣和庫，學力要裝元祐船。賸喜孟龍來並世，肯呼禰鴛與忘年。閉門筭珥無膏沐，不作傾城馮小憐。

壯心十五亦狂顛，十五年來洗濯鮮。負郭元無三畝宅，浮家安有五湖船。焚香讀易謝來况，飲綠圍紅回長年。

不是柳桃曾作惱安知世味有妍憐

再和顛字韻時方議開邊

鼎象烹調戒在顛或捐常饌美時鮮鷲形不匿磨投麓
劍影虛張蛟繞船壯觀要還全盛日圖回須似中興年
掩關雷電驚春夢憂國丹心只自憐

和胡秘書有開學中釋奠

祠官環邃殿晰燎嚮晨光工有歌咸夏人無問國庠豆
籩陳吉饗磬管奏和鏘盛事留篇什賡酬愧不揚

題袁天將追遠亭

朱棗離離實已稀
白雲閒傍隴頭飛
因思郎罷那得見
父曰子行胡不歸
樹靜風號終莫待
桂芳椿老苦相違

舍南舍北尋遺響
衰草寒煙夕照晞

因音
蹇

寶劍初期多擊鮮
嗟嗟何及淚闌干
美官孰與承顏樂
豐祀何如啜菽懽
已矣親容生死濶
要知子道始終難
共惟出處期無忝
留作松楸久遠看

次韻費同叔解嘲

乞得身來作外臣
冲然肺腑自韶鈞
鹹酸獨覺水中味
形影相依鏡裏真
入戶方聞夫子樂
近前熟試相君嗔
昊天明旦司游衍
環堵嚴於百萬人

低頭涸轍間
波臣沃以嘉言力
萬鈞逆耳倒言誠
愛助解嘲謝謗返
離真若微君告誰
能及幸不吾欺乃
敢嗔彼是紛紛姑
勿道所期終誨作
全人

次韻 闕 丞兄聞丁卯十一月三日朝報

龍章晨下九重關
帝敕元兌出羽山
揭日行空破昏闇

乘風縱燎絕神姦須看文正昭陵日孰與忠宣元祐間
更願和平培治體儒臣千歲待天顏

儻來得喪本無關或為鴻毛加太山縱昔持權寧有損
及今投裔在為姦公私界分明甚狂聖途程念慮間
初學粗知真富貴從今克復願晞顏

次韻虞永康

剛簡

題滄江書院

邂逅滄江半日間一川風物闖柴關正從逝處識流水
更向靜時觀遠山有詠皆春誰與點無時不學子晞顏

相逢一笑忘言處
月墮波心不記還

次韻虞永康讀易有作

室中萬象本寬閒
門戶何曾頃刻關
未始有時觀太極
不終止處認兼山
人文自昔先犧昊
天賦云誰不孔顏
有志未能今得友
從今迷路儻知還

再次滄江韻

夏畦初雨桔槔間
讀易幽人晝掩關
厚築水邊時一見
相逢頗恨幾年還

天然標韻聳高寒
靚面松筠取有端
直截語人人不解
等閒只作好花看

遠山雲抹半橫簪
野色昏明水淺深
庭外沈沈人不到
凜然玉雪對疎林

輕寒玉蓓試新妝
已識微酸一點黃
生意溶溶無間斷
何須聞笛為沾裳

重陰浩瀚渺無濱
草木摧殘見本真
誰識江南一枝信
明年春事正催人

滄江卜室數年間
畚築栽培僕息肩
生色油然已如此
箇中自有不須禪

樹花禽語恰逢時
真意相關兩絕竒
獨坐黃昏先得月
呼僮點筆和梅詩

幽光冷豔照前坡
花下期君不見過
木落江空歲年晚
此時朋友望西河

世間無物可談空
開落榮枯實理同
百樹好花一編易
主人立處儼當中

安大使丙生日

恭惟天祐日弈業際明良積德由文武生賢邁漢唐粵
稽資殿老降自晶山陽崧極申函粹東維傳啟祥堂堂
一代直赫赫萬夫望清廟圭璋璧明堂楓柞樟詔成來
鳳翥雲滄際龍驤誰誤玄黃篚爭馳赤白囊櫓槍星有
耀暍曠日無光白晝鳴梟獍長衢縱虎狼公卿失匕筋
帷幄自金湯昔在齊劉豫前睇石敬瑭久為敵臣妾深
入漢封疆誰似機籌妙曾無矢鏃傷邊城長男女農畝

遂耕桑惠澤孚禽獸威稜憺犬羊報勲隆爵秩紀績滿
旂常事業侔伊呂功名陋霍張巖巖千仞壁納納百川
航經國殷營室憂民旅念鄉直方坤立德中正泰包荒
天錫公難老神扶福孔穰冲襟凝白谷溫語瀉天黃壽
域周三蜀春祺徧一方蓬壺擊巖鼎壺玉扣鴛鴦御府
頒殊玩褒綸下十行繡鞍翻昱爚茸纛立熒煌萬古功
名樣千年節義香九重新政理二枋孰維綱當宁疇耆
碩非公莫便章白麻颺殿陛金袞赴文昌會整乾坤手

長令海縣康作經七六藝致主四三王自顧蓬蒿質敢
希桃李場熊占祥入夢駟頌壽如岡畫地數勛烈指心
成激昂莫馳千里足親對九霞觴天漢江山美中書日
月長願言崇令德永作世津梁

次韻李參政壁見謝遊龍鶴山詩二首

北山嘗乞草堂靈媿媿高談析理精潑眼溪光無間斷
入懷月色大鮮明寒毛絡石清可數暝靄蒸山濃欲傾
相對悠然無語處古今成敗一空枰

有鳥雲飛魚躍淵聖賢見處自天懸
流陰卒卒謾空過
斯道寥寥誰適傳人境恰逢如擇地
主賓良晤豈非天
二章發我無窮思不嫌遺編對聖賢

次韻虞永康十月海棠二首

冷淡庭梅儼玉顏孤高翠竹聳修鬟
如何富貴天然質
猶欲尋盟二友間

春意何曾間四時芸芸靜處錦成堆
非關造化呈新巧
釣播無心自不知

李德秀致政以其生日前一日約士友至長慶院訪梅花山茶因以為壽

流年苦被雪霜催惟有山中自四時寒色慙花妝歲晚
曉陰挾霧放春遲似嫌俗客不同調留與高人共勝期
但願多書冲佑考與君長伴歲寒枝

李德秀致政即席賦五言十韻用韻荅之

冬十有二月期三百六旬高懷局宇宙良會惜參辰乘
興訪安道扣窓呼孔賓襲人薰蕙若奪目爛犀珍風景

乾吟筆林花眩醉裊溪山逢舊識水竹樂閒人歲籥逡
巡換春暉次第新撫時嗟易失涉道渺無因循物探天
運冥心觀我身相期共無斁不與迹同陳

次韻黃侍郎疇若滄江海棠六絕

妙處東皇可得知溶溶生意不停機雨寒日暴渾無賴
憑仗陽和為解圍

沙暖花香弄午晴苦撩詩思浩難禁偷閒不辦追年少
只有春風會此心

為憐一片曉雲紅未放千絲暮雨濃
調變陰陽賢岳牧
滿川花意得春容

慣踏郊原浩蕩春重來春雨物俱新
渠雖自有生生意
把握天機是主人

帝恐嘉花不易成好風遲日故來承
繁紅錯眩漁人眼
不識滄江有武陵

指麾紅紫思無濱
抵當丹青筆有神
百樹花間一編易
主人意韻鎮長新

次韻王茶馬海棠四絕

一春風雨亂書堆
桂口林間未放開
浩蕩和風褰客袂
來看大樹簇池臺

善識花人盡倚闌
不將榮悴等閒看
繁華奪目春如醉
獨有懷人問考槃

右清淑堂海棠

宅在道傍如寶坊
一奩明玉颺新妝
當年共賞人何在
萬里相思夢寐香

右王氏花屋海棠

二十四番花信風
川原何處著繁紅
逢人謾說燕宮舊
廢址荒營暝靄空

右燕王宮

次韻黃侍郎疇若生子

未用占呱泣
懸知頭角疎
芝蘭庭殖殖
梧竹厦渠渠
虎子驅黃犢
禽兒駕小車
迺翁何以遺
行李五車書

題梓潼廟

士生一世果何事道喪千年不得傳富貴熏天隨手盡
詞華蓋世為人妍直將了了聖賢質只辨區區文字緣
神為斯人扶正學試教夢者一醒然

題上亭驛

紅錦棚盛河北賊紫金盞酌壽王姬弄成晚歲瑯當曲
正是三郎快活時

九月八日類試別所與同事飲而有作

彼顛氏子太鷓張藥果丹瓢為汝忙堆案文書埋白日

閉門風雨厄重陽酒嘗友我胡為崇菊亦愁余未肯黃
閒玩羣陰藏九九花開身健竟須償

次韻監試潼川提刑張兵部鈞有懷家木犀

形安字泰即吾鄉花解隨人到處黃何事歸心起張翰
有來妙語出君房榮枯境裏自殊觀造化機中無別香
不見儋州安樂法隨花隨客作重陽

用黃侍郎疇若韻題宇文發運瑞萱亭二首

春風拍拍壽觴前人有何憂樹爾萱老眼未忘兒女愛

花隨人意瑞家園

花開鄂鄂自相親
枝葉根心一氣春
認得箇中真血脈
孝慈天分匪由人

用李致政韻題臨邛陳氏所居呂仙所留回道
人來四字

負甕城邊閒日月
翻環門上幾春秋
東陽謾識榴皮字
南郭曾偕柳樹遊
踏雪飛鴻痕偶在
寒潭過雁影無留
至人御氣無今古
妙處疑同上下流

呂仙舊傳一名回道
人一名無心昌

老一名無上宮
主皆呂字也

燕新進士

已辨書生場屋緣
楓宸入對字三千
玉堦喜得方寸地
屋漏如臨咫尺天
學自孔顏期用世
道非堯舜莫陳前
便聽第一鴻臚唱
衣鉢如余未足傳

送唐述之季乙赴任對

快著青冥軟玉鞭
穩騎駿耳踏雲煙
便持全蜀無雙譽
去聽賓臚第一傳
衆所望君皆爾耳
人之好我豈云然

古來名下無虛士試玩盈科放海篇

已未唱第後謝恩詩

聖皇學問富春秋當宁宵衣渴壯猷
鵠立銀袍天北闕龍飛金榜殿西頭
彤池繆對三千字黃甲俄輸一二籌
初學粗知存大體紛更要洗洛陽羞

鶴山集卷七

欽定四庫全書

鶴山集卷八

宋 魏了翁 撰

律詩

次韻眉山胡宰喜雪

龍公試手發陰機，鎖定愁雲陣不飛。
老樹垂垂低欲壓，穉苗蕤蕤爛生輝。
窮冬莫厭詩筒數，富歲先占訟牘稀。
擬待明朝約清賞，剡溪興盡酒船歸。

次韻李參政壁李提刑壁見和鴈湖觀梅

春事何須羯鼓催，好春全看未花時。
雨餘庭院湖光濕，人倚闌干夕暝遲。
正會意時俄起，起到忘言處謾期。
鴈湖飲散人歸後，曾問梅花復幾枝。

次韻李參政壁上劉舍人閣學光祖

滔滔陸海與潘江，得似韓渠受籍瀧。
天下美官容易得，世間清論苦難降。
龍隨凡介便儔伍，鶴聳孤雲誰等雙。
一馬二童無計決，山中花竹揔麾幢。

和別駕喜雨四絕

四山鎔日瀉黃金誰載亭聳一尺霖息處生機無間斷
劃然有頃驗天心

夏畦活活翠芊緜起視微雲尚黯然底事化工渾不費
笑余何敢更貪天

爾游爾衍與天同無處無時不感通芸鼓漸稀鈴索靜
茶煙搖颺晚香中

江頭夜釣雨連明可是漁翁太不情白鶴縱違華表約
黃鷄應念越人盟

燕孫節推 揆

快著青真鞭玉鞭直驅駮耳踏雲煙等閒禮樂三千字
酬答艱難十九年鼎甲聲華今有繼政餘事業豈無傳
願君更拓勛名地重玩盈科放海篇

人日約李提刑

壁

李參政

壁

登墓願馬上醉書

只從元日到人日便覺新年勝故年買酒買符醉舊社
宜蠶宜麥祝新田般添和氣開花柳催送韶華入管絃
我本田间飯牛者偶來邂逅亦犁然

李提刑

壁

李參政

壁

再和招鶴詩再用韻以謝

靜看澆濁幾游鱗
爭似玄裳縞袂春
幾度有書招不至
應慚側翅傍他人

錦江相去幾何哉
未見窓前落雪皚
聲氣同時無間斷
有時夜半掠江來

鬚眉皓白何為者
未出山時舉世忙
若使當時容易致
等閑鶩鶴混魚梁

弟兄孫子總英明
玉雪成圍眩晝晴
寄語茅山何道士

不須苦共鶴尋盟

再和招鶴

仰看翔翮俯游鱗物意容容各自春
遙想滄江五君子長身玉立伴閒人

聲色於渠何有哉銀潢刷羽雪皚皚
天邊亦是閒游耳爭向人間問去來

蒼苔散啄傍清江被服委蛇肯肯忙
清唳九皋天聽在

也知雅意笑鵝梁

肯肯未詳

蓬萊雲近綺疏明
鶴砌分茶午夢清
何似林間者不足
併呼鷗鷺狎齊盟

李參政壁
拆贈黃香梅與八詠俱至用韻以謝

黃雲冉冉曉蒼蒼
閒倚平湖只自香
較似寒枝雖未至
依然風韻挾冰霜

犀鎮簾帷風綽開
當庭恰似剪花回
眉間一點看渾似
笑領江南春信來

露拂薔薇不太深
春風庭院晚陰陰
來遲未入黃昏句

誰喚錢塘人姓林

入眼風光似世情
金裳玉質轉分明
額黃十二誰分似
疑是仙人成智瓊

冰魂玉骨一枝春
風格南昌舊子真
誰幻神仙黃白術
時裝近日太尖新

玄天黃露真顏色
金步搖中顫舞娃
更倩南窓書妳味
不妨來伴太常齋

和羹心事歲寒姿
若第風標舍更誰
謾道色輕花更豔

幾成塗抹水邊枝

詩翁曾住玉皇家
剛與梅花定等差
染上鞠衣宮樣淺
練裙縞帨覺無華

李參政壁約客訪西郊
海棠予以齋禁不與

十日花期九日齋
相圍紅錦爛成堆
不將小雨輕陰駐
剛把和風暖日催
詩筆都隨許昌去
春光不待牧之來
要知榮悴適然耳
明日茶蘼芍藥開

再和

芹宮日晚守祠齋
爭見花如火齊堆
不復少年黃犢健
任令急景白駒催
繁紅才伴栗留至
衆綠又驚鷓鴣來
到會意時須命酒
莫論花謝與花開

次韻虞萬州

剛簡

滄江海棠

維摩老子菌生庵
門外滄江綠正涵
夜雨村村折花柳
春風日日長桑蠶
晚粧才記海棠睡
朝色俄看禁藥酣
造化新功鎮如此
撫詩徃徃發余慙

上巳日約同僚過巖願晚視新開橫江堰

朧魄雙交氣候新
古今為樂屬茲辰
蘭堂座上皆豪逸
韋曲水邊多麗人
顧我未能真免俗
邀賓聊復共行春
却因遊豫思民事
檢校城東白虎津

題李彭州堅南亭

花木精神面面全
誰將好景作南園
栗留枝上春風思
鷓鴣聲中晚屐痕
簷外梅磬兄及弟
檻前竹鶴子生孫
我今猶是數旬客
遇意快時即打門

送李梁山錫之官

時論苦伊優如君莫肯留乖逢惟有命爵義不同謀且袖長年手來乘淺水舟人間初水漲一室自天遊

質行疑似鈍至論本亡竒一寸虛靈地千年德政碑更窮山犖确毋嘆路逶遲官職將來作天公自己知

趙深甫 午年七十有親九十貧無以養索賦詩

困蹇音蹇思郎罷久無炊父曰子行胡不歸負米上堂寬帶索不妨過地戲兒衣

題三衢于杓艮室

後前止字誤箋題只認連山終物時雨霽雲收青不改
悠然依舊看朝濟

次韻李彭州

壁

訪山居三絕

只嫌秋隘近城居無著名山萬卷書不道八荒皆我宇
獨於此處認吾廬

古剡溪頭寄短椽山陰勝韻更誰傳似聞昨夜高軒過
人怪儒衣挂擔肩

不須更草北山文歸去開關掃白雲興未盡時仍重訪

我非避世可同羣

次韻李參政壁秋懷十絕

怒濤撞擊吼籠銅
驚倒江邊百歲翁
西望陰霾猶未定
火雲偏在五雲東

穉金老火戰重圍
京洛緇塵點客衣
輸却東園南閣老
水花闌檻夕陽稀

塊北群靈付大鈞
人生於世本何營
浩然中夜存存氣
不藉西風夢亦清

書棚尚有送春詩只見秋風滿範圍
夜雨牀頭多釀酒
天邊一舸有人歸

月華如水恰中庭
烏鵲枝頭栖復驚
晚暑三亭隨雨過
秋聲一半在蟲鳴

怒雷噀雨吹塵沙
樛枝草樹紛籠加
可憐荷屋風不定
但有白紅三數花

河神不恤吾民勤
濤頭射山危欲傾
似聞凌雲灘頭水
前日肉薄幾危城

母心日日兒當歸
屋山看盡烏鳥栖
安得使我如飛鳥
母旁衮地為兒啼

止處流行息處生
春作夏長秋敷榮
其間毫髮皆帝力
民日用之無能名

新詩妙處古人過
節制場中老伏波
枯腸亦知費搜攬
奈此風景觸撥何

次韻李參政壁賦墓頤新堰三首

墓頤江上靜無濤
永逸功夫在一勞
昨晚秋風原上看

長腰粃米薦琴高

夏秋雨集澮溝盈雨過江空洲渚生事到無根元易涸
要將心地作池城

八表雲昏氣候偏秋霖成澤市乘船平舟老子閒無事
看盡熙豐祐聖年

魯提幹獻子以詩惠分茶椀用韻為謝

禿盡春窓千兔毫形容不盡意陶陶可人兩盃春風焙
滌我三升玉色醪銅葉分花春意鬧銀瓶發乳雨聲高

試呼陶妓平章看正恐紅綃未足褰

次韻虞萬州

剛簡

見寄除夕江村餞臘二首

非我江山許我賒有涯生事不無涯
雨添餅餌村村秀風作羹膈樹樹花
行玉盤中看物化縷銀幡裏感年華
初春心事誰人解夢落滄江處士家

處士西城落照邊春風吹袂意泠然
閒中受用封千戶聖處功夫祿九遷
竹外緩觴留急景沙頭飽飯看豐年
詩來發我無窮思擬上滄江別看天

南郊祖帳賦五十六言呈劉左史

光祖

綠水青蛙潑眼明
紅英翠栢伴將迎
春懷拍拍渾無極
王事忽忽若有程
迅驛星馳驚客夢
白袍鵠立喚人行
所嗟文物寥寥甚
况忍同時別兩卿

許侍郎弈同飲郊外王氏亭分韻得風字

萬綠成帷漲晚空
不知門外幾番風
月拖樹影闌干角
燭挾花陰酒醖中
飲雋青山如有問
曲終遠意浩無窮
登臨此地知多少
氣味應難似此同

送李左史臺郊外和范瀘州子長贈李韻

滔滔斯世果誰歸行止乖逢自四時桃李貪看炫春畫
管麻誰解漚東池雨雲翻覆人輕薄早曛艱難女仳離
須信人生歸去好此行惟有鴈行知

別東叔西叔二兄于遂寧門外

畢逋枝上曉光和日日庭闈盼樹柯風送驪歌驚短夢
雲拖鳩雨濕長坡母心念子無時足王事催人無奈何
但祝愛身崇令德長教此意得天多

次韻遂寧府宴貢士即席賦二首

過盡一春花信風魚天鼓浪送蒙衝鳳翰有目爭先睹
牛角無人歎不逢選試謾稱新漢使作成端屬舊春宗
鹿鳴賸作中和曲催送飛黃出蟻封

誰把浮華變古風頽波衮衮日奔衝人情容易隨流去
此道分明觸處逢學似董晁猶有累文過元白愧無宗
諸君自此皆升矣更向根基厚自封

虞萬州生日剛簡

玉湖面面碧回環六月寒飈撼屋山跨鶴不隨塵夢去
臥龍甘與壁梭閒漁樵是處便爭席利欲年來早閉關
拂拭石君勤把酒照人風節兩孱顏

滄江深處汲難渾世味濃枯不見痕竹影移枰風澹蕩
芰荷搖艇月黃昏坎離合處靈根峙剝復機中碩果存
問地人才如許秀可能投老釣魚村

初度相望十日期一尊無路扣江扉羈人職事門重鍵
堆案文書山四圍未辦五千餘卷讀空慙三十九年非

遙思道義賓朋集夢作滄江鷗鷺飛

董侍郎居誼生日三首

紫氣飛騫一馬驄當年輕下五雲東詩書意味江都相
琴鶴規模清獻公長嘯驅風靜秋戍精神喚雨作年豐
列城香火知何限蒸起祥雲入頰紅

上到青天更上頭好風滿地水連疇雲開玉斧河邊戍
月照金牛峽外秋舉目河山無盡藏關心籌略最高樓
辛夷花下烏塘曲未許夫君憶舊遊

潞公曩自蜀遄歸約僅踰年秉政機當日燕毛誰與並
後來接踵未應稀從星元合陪天柱戴氣寧當遠日畿
會看傳宣燕私第賜香成霧綵成圍

王總卿鉛生日二首

上到青天更上頭蜀人猶記舊星軺安絃在昔猶危柱
挂壁於今倚大昭棠樹留春便野爰桂花和月引仙瓢
風雲不隔連天棧門戶三槐拂絳霄

浮雲擺綬卷晴疇一目天隅盡好秋路有醉人挑襍襖

邊無嘶馬趁兜鍪開張叶氣憑弧矢收拾豐年報冕旒
小小經綸已如許不應留滯古梁州

登冠山次瞻叔兄壁間舊韻

蘆花樸樸雪連天楓葉慘慘日滿山似識遊人非俗客
遠峯呈露玉孱顏

又到黃昏別有天落霞明月水月銜山亂煙遠樹供詩卷
濁酒狂歌伴醉顏

與劉左史

光祖

同別楊少卿

子謨

于南郊舟中

用宋兵部德之韻

玉龍老子訪仙鶴冲佑散人歸瑞烏俗事祇今長刺促
可人自昔費招呼憂時恨不百子駿背我寧堪二大夫
艤櫂黃昏不成別畫成江上送行圖

再用宋兵部德之韻送劉左史光祖

繫維不住谷中駒愛戀徒占屋上烏開漢樓前迎劍騎
臨津門外罷傳呼宅家未忍忘賢傳衡宇胡為戒僕夫
閣束衣冠聊一笑不為耐辱司空圖

次韻李參政

壁

和薛祕書

緩

詩見寄五首

寒城眺晚牛羊下
翠蕩涵秋鶴鶴飛
風雨燈前話疇昔
應懷坡穎不成歸

扶木之陰三萬丈
曉光絕出衆山尖
分明大路平如掌
朝發崑崙夕至崦

行有尚時觀習坎
不終止處認兼山
止中自有流行好
不在從違用舍間

將相時來應不免
人生難得自由身
及今且續宋六藝

莫逐蟲魚注李巡

書來寄我薛公詩磊落襟期慰我思所謂伊人在空谷
公侯逸豫鎮無期

譙申甫惠詩有隨緣婚嫁之語因次韻贊之

幾見三星挂屋榮人生難得是青春已驚梅實盈筐筥
方待河魴下釣綸了事未能超俗見感時寧不念天倫
隨緣婚嫁君言是且把乖逢付大鈞

鶴山集卷八

欽定四庫全書

集部
鶴山集卷十九

詳校官庶吉士臣張溥

主事臣呂雲棟覆勘

總校官檢討臣何思鈞

校對官編修臣楊壽楠

謄錄監生臣瞿秉虔

欽定四庫全書

鶴山集卷九

宋 魏了翁 撰

律詩

次韻瀘帥范郎中

子長

再和所送李季允

真韻

見寄

人老邊關未得歸，行違久速只安時。
令隨天濶風搖嶺，語挾春來草夢池。
舊壘無華閒睥睨，新機有句到侏離。
孤衷耿耿無人會，只傍天公作已知。

新陽拆地喚春歸，生意綿綿重此時。
青女卷寒還朔易，朱輪駕暖出咸池。
恩流未滲魚猶涸，禁網雖疏雉或離。
撫事傷時無限意，馮梅折寄故人知。

題年節叟介壽堂和劉左史

光祖韻

兒大詩書敵富強，婦供滸瀆養尊章。
照盤曉日龍為炙，介壽春風玉作堂。
禮物皆由天賦分，家榮亦使里生光。
人生有子不翅足，况復孫枝習氣香。

次李參政

壁

所和五絕句韻，因以為壽五首。

竹外舉禽相與和湖邊沙鴈自由飛美人醉踏梅花月
笑領明年春事歸

過眼浮雲齊劒映會心真趣付爐尖羲皇弭節前途路
日景方中未迫崦

漠漠煙塵連北道幽幽草樹蔽南山照人明月長無寐
遶遍清風五百間

天地之心萬物靈世間難得是人身面前放過知何限
好與光明做一巡

天如有定開平治寧患無人安子思到出手時須卓卓
逢開口處莫期期

再和前韻答賦五首

羣蜻海上迎機舞雙鴈天邊避弋飛
瑩瑩此心天與識
滔滔斯世我誰歸

秋到山川自童涸春回草木又勾尖
陰機盡處雷居地
月魄生時日在崦

甫田之田

去

驕驕莠大國之郊濯濯山養且難成
摧則

折寧居材與不材間

別來滿眼簿書塵想像湖邊玉立身
文陣時傳騷將令愁城不倩酒兵巡

一聲鳳唳朝陽裏慰我雞鳴風雨思
藐藐大鈞那可問有才動與厄相期

書遂寧何氏穩興齋

巫峽孤舟嫌太重山陽小艇又偏輕
直須裝載停勻著更要其間御者平

赴遂寧進士期集即席賦

聘幣鳴騶選實才輦輸使者作行媒般添春意和瓊墨
催送花風上翠苔世論且然聊爾耳諸君行矣勉之哉
邦人此意毋虛辱滿貯香名萬里回

送劉類元

炳

奉對闕庭

突兀脩名磊砢曾一鳴冠蜀未酬公十年解瑟無調瑟
百載張弓未弛弓剝啄門邊誰主客畢逋城上孰雌雄
引吭為作朝陽瑞攜取香名壽迺翁

二月二日遂寧北郊迎富故事

才過結柳送貧日又見簪花迎富時誰為貧驅竟難逐
素為富逼豈容辭貧如易去人所欲富若可求吾亦為
里俗相傳今已久謾隨人意看兒嬉

二月十九日席上賦四首

野荼蘼發雪堆牆草牡丹開月照梁世眼都隨人毀譽
不知底處是真香

露漬風揉嬌婀娜煙籠日炙綠鬢髻風流名字時方污

亦為儀容太不矜

昨宵渾不遣花知
畚鍤和根帶露移
睡裏驪珠醉中屐
想花失在未醒時

年光又見一百五
春意才餘十二三
節物催人渾不覺
謾隨白墮看紅酣

翌日約客有和者再用韻四首

柳梢庭院杏花牆
尚記春風繞畫梁
二十四番花信盡
只餘簫鼓賣錫香

堆案文書長引睡
起來搔首亂鬢髻
眼明嘉卉紛紈綺
竟是脩篁聳棘矜

妙處和春莫遣知
晚尊隨柳逐花移
落花繡地春深日
翠柳篔簹空月上時

古來長恨難并四
今日相逢所就三
花裏賓朋皆臭味
夜涼風月更清酣

昨有禱于社稷及境內山川是夕枕上聞雨

郊宮方社詩攸重
川澤山林禮所崇
古祀不修牲幣廢

梵鏡聲裏紙錢風

仲春天氣似朱明
翕翕炎威惱亂人
一夜簷前天雨麥
曉來仍作本來春

次虞萬州韻送曹簡夫

彥約

守宣城待闕

旅力方剛髮未翁
不令憂樂與民同
倦人間事風塵表
收天下春襟府中
江北勤勞誰念德
湖南幹事未論功
如今又聽還家去
緩急分明要此公

次壁間韻題懷安道王三洲王氏亭六言二首

滿壁故人何在倚闌心事誰同蚤徑遊絲罨目亂山瘦
馬行空

老農不留地力萬物取其天公曲曲拗夏隴枝枝葉
葉春風

予以使事過成都訖事而歸虞萬州

剛簡成都

尉高表兄拉訪靈泉宰高表兄風雨連明遂
謁朱祭酒祠即事賦四首

蒼筤風清醉騎香滿身花影踏斜陽行花盡處山圍郭

又聽松風吹客裳

青燈相對同胞弟白酒交酬異姓兄

先是靈泉兄嘗遣詩抵虞侯云擬約

滄江異姓兄風雨似知人有約終宵都作對牀聲

無事江流到處平無言天運四時新真仙此意何曾問
直到如今瞪視人

天運無窮成變化水流不息作江淮須知瞪處非無事
莫著仙人舊草鞵

臨發潼上許侍郎奕提刑餞于東山賦詩留別

人生出處亦何常又到涪江江上鄉山色如逢故人語
松聲仍作去年香紅裳大舶滿清鏡翠澗白沙明夕陽
未省此懽何日更擬邀明月照昏黃

題潼川賈伯用崇雅閣出入體

寒鄉晚學恨無書亦有藏書不若無謾把詞章作禽犢
或鑽文字等蟲魚新籤三萬幾成肆拄腹五千猶類厨
崇雅主人來索句謾哦七字勸躊躇

約客木犀下有賦

茂樹幽花兀老蒼不隨衆卉入詞場
虎頭點點開金粟犀首纍纍佩印章

公孫衍佩五國相印

明月上時疑白傅清風度

處越黃香人才生世元如此不為無人不肯芳

八月十四日夜約客月下有賦

秋空和月卷玻璃清入肝脾觸撥詩原自生來全體具
只緣見處一分虧俗情數日須圓候識者先幾畏滿時
千古詞人誰解道擬將今夕當佳期

即夕自和

薊林逗出剪玻瓈要索人間飲與詩不飲清風嗤我俗
無詩明月慙人虧少陵正念西營日越石方驅北寇時
滿目憂端無處說且將醉口謾期期

八月十五日夜月意偃蹇夜久微明須臾復晦
瞻叔兄有詩因次其韻

長風送月九霄寬無賴浮雲意亦頑本自無私長委照
不應有礙似偏慳蒼生望治東山隱四海傾風釣瀨間
潛復雖深終是灼停觴且待夜深還

翌日對客雨中再和

風雨盲程不少寬
告馬藐藐似殷頑
苦於風月佳時競
甘向雲霓望處慳
天象自從盈裏缺
人心正要用時閒
浩然此樂無時極
應笑微之興盡還

贈相士郭灝

載小奚奴長自隨
兩牛腰大贈行詩
逢人有問輒如見
及我相遭不肯奇
每會面時長好好
但開口處或期期
道人莫是朱僊術
當與余言未及之

李微之心傳聞其弟貫之道傳西歸以詩迓之

劉左史光祖和韻屬余同賦

室中萬象鎮寬閒
舒卷風煙入鳳山
俯聽候蟲坏戶去
仰看倦鴈絕雲還

只期玉女是用諫
肯為金夫不有躬
想見江南兩膺使
天涯顛顛鬢成翁

行李營營遍八荒
麴車炙騎趁春忙
茫然獨笑無人管
寒蕙牆東蜀海棠

公卿奏疏謾琅琅誰刃樓蘭檻鬼章巢燕豫憂江以北
暮烏未到峴之陽

滔滔斯世我誰歸置散投閒分亦宜乾鵠頗驚仁鳥害
堅冰已向履霜知

曩與劉公同一邦如今背我去堂堂京師尊貴在朝者
為問誰能躡阿章

元夕卜油溪故事

不隨洛俗占燈影不學荆人問紫姑賣得薪來卜油去

豐年還似去年無

滿目憂端膏火煎
聊將膏卜驗新年
只祈五色雲瑞世
不願蚩尤旗亘天

和李參政壁正旦聞邊報

羽檄連旬月邊塵換
歲陰捉衿憂見肘
補肉忍剗心天
遠鴻飛急林疎驚
恨深直將歸徃地
都作殺狐林

茂叔兄還鄉北郊酌別

動是三年別纔堪十日留
蒼頭相與並較語未能休
祇

攪逍遙夢真成浪泊遊相期各努力歲月鬢邊道

次王萬里秋霖韻

江聲砧杵入層樓預作人間八月秋虹外挂無窮遠思
鴈聲鳴不斷新愁漢淮赤地不知里巴蜀青天更上頭
蹇我康時分無策只祈一飽暫銷憂

贈術士龔恢乙

龔生來過我極意論先天自得寰中趣無言已十年

題桃源圖

伏勝高堂書已出竇公制氏樂猶傳魯生力破秦儀陋
商皓終扶漢鼎顛隱者寧無人禮義武陵獨匪世山川
若將此地為真有亂我彝倫六百年

題賈伯用

賦

大龍阡

積薪寢火漢公卿爛額焦頭城郭臣新沔精神開白日
三泉血淚濕初春舊聞撇難須男子誰識先機有婦人
添入開禧忠義傳擬將筭珥易冠巾

次韻李參政

壁

龍鶴山廬

山色醉痕邊溪聲客枕前山溪原自舊人已別經年
天公富萬有秋事不曾貧靜閱歲時信動觀天地仁
莫使兒輩覺從渠青紫紛馬前金罷亞烏外玉齋淪
世事從頭數時機觸眼奇山靈莫留客大厦要人支

李參政壁約至井監偶得三絕

忽聞車馬下天來擁術闌衢撥不開六十七年無此客
竈前老隸亦驚猜

不乘轘轡上公車軋軋肩輿兩僕夫世道險夷隨所遇

車中只有舊時吾

溪邊鵝白蘆花瘦山下鵝黃稻實肥更得天公晴十日
今年穡事庶乎幾

題成都憲江公亮公廉勤謹忠信和柔六箴

勤似惻惻廉揭揭謹疑蹢蹢信恹恹佩韋董子柔成緩
專瑟梁丘和近同義利只差絲杪忽功夫端驗始中終
六箴須把公忠貫公處還歸一字忠

自長寧阡過靈泉兄墓藝黃經從隈支以歸

晨策犯層巔危如峭壁緣溪明人在地路絕馬行天松
倚露雲立稻依霜雨眠不知歲年晚撫事亦悠然

李參政壁生日

文章心印老傳家閒弄湖霜拭劒花時事令人添白髮
只憑書味養靈芽

天馬流行不見痕黃鍾吹籥煦乾坤坎離互處靈根峙
剝復機中碩果存

才紀官來早去官行人驚說路艱難行藏用舍何關我

時把尼淵出處看

歷盡玄枵十二辰飽看三十六宮春
纔噴一霎挂龍雨
又卷雲霓還翠旻

梅豔凌霜帶雪餘露華洗盡玉生膚
東方千騎催人去
聊折春風寄鴈湖

絕啗梁夢誤金甌又嘆祁征困木牛
只藉人才作元氣
聞公安健百無憂

安宣撫 丙 生日二首

知是皇家幾世仁
天開人物作長城
元崇雅號濟時相
景畧真成間代英
天路旂常鋪績用
中原草木識威名
北征西畧公餘事
應念同胞百萬生

踈慙煩公刮目看
肯持諛語祝加餐
千鈞弩上機寧易
百尺竿頭步轉難
事遇快時聊復忍
民當急處略須寬
掃除荆棘栽梨棗
累壁重圭耐歲寒

和楊仲禹送史子修特奏赴吏部注闕

科名寧較後先題
嘆老嗟卑世所迷
須識是間天地似

要知立處聖賢齊
人情一理塗塗附
古道千年印印泥
屬子隨時崇令德
窓前紅日未全西

和除夕前一日南叔兄會楊仲博約楊季穆

緯

詩

玄裏探幽識罔冥
易中觀象見文明
心虛有友皆三益
宇靜無時不四并
物理玩來成獨笑
年華見慣漸忘驚
只餘親友關天分
離合鍾情不肯平

人日南山寺約汪憲果

天開三十六宮春又見階糞七葉新
雨足翦來齊麥隴時和看不斷
遊輪記曾英蕩為使客却擁朱轡作主人
客主何常均寄耳繫邊認取本來身

正月九日北山雍熙寺約同官

自從寒陸爽乾坤律呂還宮歲換辰
歷紀人正纔九日斗移天位已三春
銷磨壯士姑隨俗牽引閒心苦為人
終愧時難才力短只將民命倚洪鈞

春社日記事既畢轎中得三絕

風雨聲中聽李陵起來被服對神明
歌鍾才徹車輻動
歸到譙樓恰五更

鞞然憑軾受風吹
吏皂前驚雨濕衣
豈識主人非崛強
一川生意索褰幃

陰霧冥濛慢鼓擊
田坡勃窣誤輪蹄
居人閉戶未欣起
太守車前一尺泥

觀南隄

吏報南郊役事休
好風吹袂到江頭
長隄飲水馬非馬

疊石護田牛戴牛

見考工記

處處女筐蠶望歲

蠶歲見禮記

村村

社鼓麥祈秋守臣不辦康時策只把農夫作已憂

正月九日川上之遊楊季穆

絳

以酬唱見寄走

筆次韻

雨中未放笑眉開獨守空齋著玉杯觀水功夫隨處見
逝川意思即心來

次韻李參政壁見寄三首

自失鷗邊約應羞鶴上人竹荒青翼短書遠墨題親世

事方嘗膽時賢謾飲醇國疑誰為嗣公子急振振
怕放紅樓目浮雲斷復連遠看壺聚索近視室如縣耿
耿自許國悠悠誰訊天天心那可識拄頰看晴川

湖畔三頃秫釀成聊獨斟積薪傷汲直求舊感遲任夢
裏牛山峻吟邊鴈泊深兩鄉明月夜應照舊登臨

鶴山集卷九